

आकाशवाणी जयपुर-अजमेर
प्रादेशिक समाचार ।

दिनांक 10.06.2024

समय: 18.45 बजे

00000

- एनडीए रा आला नेता नरेन्द्र मोदी प्रधानमंत्री ओहदा रो कामकाज ओजू संभाळ्यो-पीएम किसान सम्मान निधि री 17वीं किस्त जारी कीनी ।
- मुख्यमंत्री भजनलाल शर्मा जम्मू-कश्मीर मांय जातरूआं री बस माथे व्ह्या आतंकी हमला रे दौरान मरण वाळां रा पिरवार वाळां रा प्रति दुःख जतायो-मरण वाळा मांय चार जणा जयपुर जिला रा ।
- राज्य री जेलां मांय कैदियां ने समाज री मुख्य धारा ऊं जोड़बा री कोशिश ।
- प्रदेश मांय आज केई ठोड़ां बिरखा व्ही-पारो उतर्यो ।

0000

एनडीए अर भारतीय जनता पार्टी रा आला नेता नरेन्द्र मोदी लगातार तीजी दफा प्रधानमंत्री ओहदा रो कामकाज संभालता ई आज किसान सम्मान निधि री 17वीं किस्त जारी कीनी । ई रे जरिये नौ करोड 30 लाख काश्तकारां रा खातां मांय करीब बीस हजार करोड रूप्या जमा कराया जावेला । ई मौके प्रधानमंत्री कह्यो के नुवी सरकार रो पैलो फ़ैसलो किसानां रा भला री वां री सोच रो दरसाव करे है । वे कह्यो के आवता दिनां वां री सरकार खेती-बाड़ी अर किसानां रा भला सारू और मन ऊं काम करेला । मुख्यमंत्री भजनलाल शर्मा कह्यो है के प्रधानमंत्री नरेन्द्र मोदी रो सब ऊं बत्तो ध्यान किसानां रा भला माथे है । वे कह्यो के प्रधानमंत्री मोदी तीजी दफा प्रधानमंत्री बणतां ई पैलो काम देश रा किसानां सारू 'पीएम किसान सम्मान निधि' री 17वीं किस्त जारी करण रो कीनो है, जिण ऊं राज्य रा ई लाखां काश्तकारां ने फायदो मिलेला । शर्मा कह्यो के राज्य सरकार ई काश्तकारां रा भला सारू केई खास फ़ैसला कीना है । वे कह्यो के राज्य सरकार पीएम किसान सम्मान निधि रा तैत किसानां ने दी जावण वाळी माली मदद 6000 ऊं बधा र 8000 रूप्या सालानां कीनी है । मुख्यमंत्री कह्यो के गेहूं रा सरकारी मोल माथे सवा सौ रूप्या प्रति क्विंटल रो बोनस दे र किसानां ने 2 हजार चार सौ रूप्या प्रति क्विंटल रा हिसाब ऊं सरकारी मोल दियो जा रह्यो है ।

0000

मुख्यमंत्री भजनलाल शर्मा जम्मू-कश्मीर मांय जातरूआं री बस माथे व्ह्या आतंकी हमला मांय मरण वाळां रा पिरवार वाळां रा प्रति दुख जतायो है । मरण वाळां मांय चार जणा जयपुर जिला रा ई है । वे हमला रे कारण ज़ख्मी व्ह्या लोगां रे बेगा ई ठीक व्हेवण री कामना कीनी । मुख्यमंत्री सोशल मीडिया संदेश रे जरिये कह्यो के राज्य सरकार ई मुश्किल घड़ी मांय सरकार वां पिरवारां सागे है । वे अहलकारां ने मरण वाळां रा पार्थिव शरीर जम्मू-कश्मीर रा अहलकारां अर प्रशासन री मदद ऊं पिरवार वाळा तांई पूगावण रा हुकम दीना । ध्यानजोग है के काल सिंज्या जम्मू-कश्मीर रा रियासी जिला मांय जातरूआं ने ले कटरा ऊं शिवखोड़ी ले जा रही एक बस माथे

व्ह्या आतंकी हमला मांय दस जणा री मौत व्हे ग्यी ही अर 33 जणा जख्मी व्हे ग्या हा। हिफाजती दस्ता वारदात री जांच सारू खास अभियान चलायो है।

0000

मुख्यमंत्री भजनलाल शर्मा आज नई दिल्ली मांय 'राजस्थान हाउस' ने ओजू बणावण रा कामां रो जायजो लीनो। वे अहलकारां ने काम तेजी ऊं करण अर तय मियाद मांय पूरा करण सारू कह्यो।

000000

पंचायती राजमंत्री मदन दिलावर कह्यो है के धरती माथे बधती गर्मी खतरा री घंटी है। वे आज जयपुर मांय गोविंददेवजी रा मंदिर मांय पर्यावरण अर गौ रक्षा संरक्षा रा बारा मांय राख्खी ज्या संतां अर श्रीमद्भागवताचार्य विद्वानां रा सम्मेलन रा उद्घाटन रे मौके बोल रह्या हा। दिलावर कह्यो के रूखड़ा ही बधती गर्मी ऊं बचा सके है। पंचायती राज मंत्री कह्यो के संतां अर गुरुजनां ने प्रवचनां मांय बत्ता ऊं बत्ता रूखड़ा रोपण री सीख देवणी चाहिजे। मंत्री अमृता देवी रा बलिदान ने याद करता थकां रूखड़ा ने बचावण सारू काम करण री अपील कीनी।

000000

नुवा बणायी ज्या तीन आपराधिक कानून एक जुलाई 2024 ऊं लागू व्हे जावेला। आं कानूनां रा बारा मांय जाणकारी देवण सारू आकाशवाणी समाचार जयपुर री ओर ऊं प्रादेशिक समाचार बुलेटिन मांय नुवी श्रृंखला चलायी जा रही है। आज पेश है आं कानूनां मांय डॉक्टरां ने गैर जरूरी परेशानी ऊं बचावण सारू करी ज्या प्रावधानां री जाणकारी :- भारतीय न्याय संहिता, 2023 स्वास्थ्य देखभाल रा हलका मांय गैर-जरूरी उत्पीड़न ऊं बचावण सारू कानूनी ढांचो मुहैया करावे है। इण मांय पंजीकृत डॉक्टर ने ईलाज मांय लापरवाही सारू दो साल ताई री कैद अर जुर्माना री सजा दी जा सके है।

धारा 51 (3) रे मुजब डॉक्टर ने बिना देरी आरोपित री मेडिकल जांच रपट जांच अधिकारी ने भेजणी व्हे है।

किण ई महिला सागे यौन दुराचार रा मामला मांय वां महिला री मेडिकल जांच रपट पंजीकृत मेडिकल प्रैक्टिशनर ने सात दिन री मियाद मांय जांच अधिकारी ने भेजणी व्हेला।

00000000

दुनिया मांय जेल खानां री सरूआत अपराधियां ने सुधारण रा मकसद ऊं करी ज्यी ही, पण बगत सागे जेलां केवल सजा पूरी करण री ठौड़ बण र रह ग्यी। मौजूदा दौर मांय केई जेलां मांय कैदियां ने सुधारण रो मौको दे र वां ने मुख्य धारा ऊं जोड़बा री कोशिशां करी जा रही है। झुंझुनूं री जिला जेल मांय ई भणार्ई-लिखाई रे मार्फत कैदियां ने समाज री मुख्य धारा ऊं जोड़बा री कोशिश करी जा रही है। जिला जेल मांय खुला आसमान हेटे साक्षर बंदी अणभण्या कैदियां ने साक्षर बणावण सारू भणा रह्या है। जेल अधीक्षक प्रमोद सिंह बतायो के जेल मांय साक्षरता रा बारा मांय न्यारा-न्यारा नवाचार कर्या जा रह्या है अर आं रो फायदो अण भण्या कैदियां ने मिलण लाग्यो है।

00000

राजस्थान पुलिस स्थापना दिवस रा सिलसिला मांय राज्य मांय आज न्यारा-न्यारा आयोजन सरू करी ज्या। केकड़ी मांय एस.पी. विनीत कुमार बंसल अर पुलिस रा दूजा अहलकार एस. पी. रा दफ्तर परिसर मांय पौधा रोप र स्थापना दिवस कार्यक्रम री सरूआत कीनी। **झुन्झुनू मांय** एस.पी. राजर्षि राज वर्मा यातायात प्रदर्शनी रो उद्घाटन कीनो। इण रे जरिये जनता ने आवण-जावण रा नियमां अर हिफाजत सागे आवण-जावण रा बारा मांय जाणकारी दी जा रही है।

000000

फौज री सप्तशक्ति कमान री पर्वतारोही टीम उत्तराखंड मांय 8 हजार 936 फीट री ऊंचाई वाळी बुग्याल फाचू कंडी ताई चुनौती वाळा ट्रैक ने कामयाबी सागे पार कीनो है। डॉट ऑन टारगेट डिवीजन री ई टोळी मांय दो-दो अहलकारां अर जूनियर कमीशंड अहलकारां समेत 14 जणां शामिल हा। ई कठिन सफ़र रे दौरान आ टीम हिमालय परबत रा मुश्किल हलकां मांय चढ़ाई करता थकां 156 किलोमीटर री दूरी तय कर र फाचू कंडी चोटी माथे तिरंगो झंडो फहरायो। टीम मोरी रा गांव मांय स्कूली विद्यार्थियां ने फौज मांय शामिल व्हेवण री सीख दीनी। वे ई हलका रा पैली वाळा फौजियां रो देश री सेवा करण सारू मान कीनो अर पौधा रोपण रो अभियान चलायो। ई दौरान मोरी गांव रा लोगां सारू मैडिकल कैम्प ई लगायी ज्यो।

00000

प्रदेश मांय आज केई ठोड़ां हल्की बिरखा व्ही। **भरतपुर** मांय संवारे तेज गर्मी पाछे दोपहरां पाछे बिरखा व्ही अर सीळो बायरो बाजण ऊं गर्मी ऊं साता मिली। **डूंगरपुर** जिला मांय ई आज सिंज्या आंधी चालण पाछे बिरखा व्ही। **बांसवाड़ा** मांय संवारे री पोर बादळा मंड गया अर केई ठोड़ां बिरखा व्ही। **झालावाड़** मांय ई बादळा मंड्या रेहवण अर बायरो बाजण ऊं मौसम खुशनुमा व्हे ग्यो। ई बीचे मौसम विभाग आज कोटा, उदयपुर, जोधपुर अर बीकानेर संभाग मांय कठे-कठे बिरखा व्हेवण रा आसार जताया है।

00000

सिख पंथ रा गुरु अर्जुनदेव री याद मांय आज झालावाड़ जिला रा गुरुद्वारां मांय अखण्ड पाठ अर खास कीर्तन रा कार्यक्रम राख्यी ज्या। केई ठोड़ां छबील लगा र आवण-जावण वाळां ने शर्बत अर टंडो पाणी पायी ज्यो। जिला रा झालरापाटन री श्रीगुरुद्वारा सिंह सभा रा सदस्यां कानी ऊं संकीर्तन अर गुरु ग्रन्थ साहिब रो पाठ करी ज्यो। झालरापाटन, झालावाड़ अर भवानीमंडी मांय ई ऐड़ा कार्यक्रम राख्यी ज्या।

000

जयपुर हेरिटेज नगर निगम री स्वास्थ्य शाखा 6 सौ 20 किलोग्राम सिंगल यूज प्लास्टिक जब्त कीनो है। बगरू वालां रा रास्ता रा एक गोदाम ऊं ओ प्लास्टिक जब्त करी ज्यो। आरोपित ऊं 55 हजार रुप्या जुर्माना रा तौर ऊं वसूल करी ज्या।

00000